

մեկը, Եզնիկը, իր ժամանակի կրօնական ուղղության դեմ: «Մեր բերանները հոտել են պառ պահելուց, եւ մեր լեզուները բթացել են սաղմոսներ երգելուց, իսկ այն, որ պահանջում է մեզանից աստուած, սեր եւ խոնարհութիւն, այն մենք չունենք. միայն մեր շրթունքներով ենք սիրում աստծուն, եւ այդ աշխատանքը իզուր է: Անասունների միւս չեն ուտում (աբեղաները), բայց իրանց եղբորը անյագ կերպով կեղեքում են, գիւնի չեն խմում, բայց իրանց հոգին արիւնով շաղախում են, ամուսնացածներին ատում են, բայց իրանք իրանց պիղծ խորհուրդներով միշտ պոռնկութիւն են գործում. հագուստների վատն են հագնում, բայց ազահութիւնից այրում են. այդպիսիներից պետք է փախչել եւ ոչ թէ նրանց հետ հաղորդակցութիւն ունենալ»...

— Դրանք, — առաջ տարաւ Ասլանը, — որոնց նկարագրում է Եզնիկը, ի հարկէ, պետք է նրա ժամանակի կեղծաւորները եւ փարիսեցիները համարել, որոնք բարեպաշտական դիմակի ներքոյ սնուցանամ էին ամենաանբարոյական կրթեր, թէւ այդ կեղծաւորները ամեն ժամանակ մեծամասնութիւն են ներկայացրել: Բայց ամենավնասակարը միշտ այն է եղել, երբ այդ աբեղաները անկեղծութեամբ են վերաբերուել իրանց ուխտին: Որովհետեւ սպանել, ամեն զօրութիւնից զրկել մարմինը մշտական պահով, ծոմով եւ խիստ ճգնութիւններով, որ նա անընդունակ լինի որեւիցէ ցանկութեան՝ դա ոչ այլ ինչ է, եթէ ոչ, մի տեսակ հոգեւոր բարբարոսութիւն: Ամեն օր, ամեն ժամ, անդադար միեւնոյն աղօթքների կրկնութեամբ բթացնել միտքը եւ զգայուն, մտածող էակից դարձնել մի տեսակ անգիտակցական մեքենայ՝ դա կատարեալ հոգեսպանութիւն է: Այդ բոլորը միշտ կատարուել է մեր անապատներում, նոյնը կը տեսնէք եւ այստեղ: Այդ բոլորը կատարուել է մարմնի, հոգու եւ սրտի վատ ցանկութիւնները սպանելու նպատակով: Բայց երբ մարմինը, հոգին եւ սիրտը բռի միջոցներով անընդունակ են դարձնում վատ ցանկութիւնների, շատ բնական է, որ նրանք, միեւնոյն ժամանակ, կը կորցնեն եւ լաւ ցանկութիւնների ընդունակութիւնը: Մարդը այդ դեպքում կը դառնայ մարմնով կենդանի դիակ, իսկ հոգով՝ ապուշ, եթէ չասենք խելագար:

Ասլանի դատողութիւնները շատ գեղեցիկ էին, բայց ես քաղց էի զգում: Ծովային սառն բաղանիքը, որ ալեկոծութեան շնորհիւ վայելեցինք մենք, սաստիկ բաց էր արել իմ ախորժակը: Ես այժմ ոչինչ բանի մասին չէի ափսոսում, որ կորցրինք ծովի մէջ, այլ ափսոսում էի միայն այն տապակած վառեակների եւ սպիտակ լաւաշների մասին, որ Ծովիկը թաշկինակի մէջ կապեց եւ իւր ձեռքով տեղաւորեց մեր նաւակի մէջ: Անհամբերութեամբ սպասում էի աբեղային, որ գար եւ մեզ հրաւիրէր սեղանատունը: Բայց ե՞րբ պի-